



Manipulatore hänn bi uns nyt verloore

Als Alti Garde hesch per see
 kai bsunders Fortschritts-Renommee,
 me dänggt jo maischtens vo de Alte,
 sie wurde sich ans Alti halte,
 geege Veränderige sich stemme
 und by allem Neye klemme.
 Doch wie bi jeedere gfasste Mainig
 sinn sich no lang nit alli ainig,
 in däre nit ganz lyychte Zyt
 verbringt me vyl z vyl Zyt dermit
 zem Diskutiere und zem Klaage,
 was me deerf und nit deerf saage.
 Me ligt uns jo scho sit vyyle Joore
 wäg däne Moore in de Oore
 und sag nie amme Kemmifääger,
 er syygi schwärzer als ä Nääger,
 in dem Fall wirtsch grad registriert
 und als bolitisch nit korräggt marggiert.

Wär steggt hinder däre Woke-Idee
 em Genderstäärnli und LBGT,
 Cancel-Culture und Literaturzensur?
 Ass alles das kasch duureschtiere,
 muesch intensiv manipuliere,
 am Beschte uf Social Media,
 will das jo jeede Dottel kaa
 und ass dir d Lyt au noocherene,
 muesch di halt Influencer nenne.
 Schurnalische, Bolitigger, Massnahmekritigger,
 Professoore, Verschweerer und au Versaager,
 Manipulatore kemme us allne Laager.
 Sie beschäftige sich mit alte Gschichte,
 anstatt de Bligg uf Zuekunft z richte.
 Die wird woorschynlig zimlig bitter,
 das erfaarsch nit nur uff Twitter,
 You Toubes und Tik Tok sind äänlig schitter.
 Telegram und Instagram sinn au nit nätt
 und gluschtets di noch härterer Koscht,
 dän versuechs doch mol mit Darknet-Poscht.
 S goht nümm lang, dänn ischs sowyt,
 ass mir zruggluege uf d Pandemie – als die gueti alti Zyt.

S wär jo no vo vyyle Griise z brichte,
 näbe em Berset sine Gschichte
 isch au no Grieg und gruusig Wätter
 und anstatt haize suffsch e Kaffi Jätter.
 Wäge dr scho fascht vergässene Inflazioon
 gits e Fasnachts-Bryys-Sensazioon.
 Wenn de mainsch, de Baizer spinnt,
 dänn zaalsch am beschte grad mit Twint,
 do musch kai Bargeld logger mache
 und drby kasch ohni Mie s Konto lässig iiberzie.

Noch dem negative Gruus
 ischs Zyt für positivi News!
 Mir kenne wiider Fasnacht mache,
 kenne drummle, pfyffe, lache,
 enander de greschti Mischte verzelle
 oder saage, was mir scho lang hänn saage welle.
 Drei Dääg zem Gniesse und zem Schwelge
 und am Dunnschtmorge noodisnoo
 de Kater lo versuurre loo.

* * * * *

PS:
 D Ladäärne-Uusstellig uff em Minschterplatz und d Waage- und
 Reggwisyte-Uusstellig bi dr Kasäärne sin vom Määntig znacht bis am
 Mittwuch demoorge!
 Deert und an de 3 Verkaufsständ (CINS) in dr Stadt ka men au alli
 Zeedel und Schnitzelbängg, d Blaggede und dr Rädäbäng kaufe.